

OTERKOKL RA RURT EL MO PRESIDENT



Ak nguu tial techall e mo osus er a Ibedul, Reklai, Rubekul Belau, Bilung, Ebil Reklai, me a rengeasek el sechal me a redil me a dirrek a rechad er Belau el rokui.

Ak merema duum er kemiu el mo ouchais er a uldesuek el mla oterkeklii er a renguk el mo remurt el mo President er a beluu er Belau. Ak mesisiich loumerang el kmo, ng sebechek el mo kudmeklii a mesisiich, e cherrungel, e klemerang lomerredel, el mo ngosuir e mekrolii Belau el mo ta er a mesisiich, e cherrungel, e klemerang lomerredel, el mo ngosuir e mekrolii Belau el mo ta er a mesisiich el lungs er a chelsel a Pacific.

Se el kdul kmo, Mesisiich, e ng belkul a kmo; a ta me a ta el chad a sebechir el mo ungil e kldmokl a klengar er tir me a telungalek er tir. A mesisiich el Belau a belkul a kmo, a bek el chad er Belau a mo ngmai a blingelir er a klungiolel Belau.

A Belau a nga er a chelsel a chitituokel el taem; A ngesou el dolai er a ikrel Belau a merael el mo melai ngesonges, e a delengchokl a merael el mo er bab a siungel. Me a Belau a kirel lomekall el mo sebechel di ngii el mendedmokl er a keizai er ngii, ea a re bek el chad a kirir el dmak el merael. Ng kired el dmak el omekall el ousbech er a ungil eolt me a berius e loldubech er a omeius er kid, el dmak el metebecheliia tia el mlai meng merael el melemalt el bedul medal.

A rechad er Belau a kirir el ta rrukliir er a techall el ngar ngii er Belau. Me a kmo remurt el mo President, le kuumerang el kmo ngsebeched el rullii a ungil lurreor. Ak medengei el kmo, ng sebeched el rullii a ungil lurreor. Ng kired el motab osenged el kirir a rechad ra beluad. Ng kired el rullii a delengchekliir ma klengar er a rechad el mo ungil.

Se er a kot lomuchel a siobai er ngak er a okedei el rak er a mla memong, e ak mle chad er a omenged, e olterau a ngikel el ngar er a torak er a medal a Palau High School, e milsang a techall er a ureor er a klekangkodang, me a kekerei el siobai, lolterau a klalou, me ak mlo omuchel el lou tourist a le mellomes ea le klebesei e ak nga er a chei, me bo el sebechel melemolem a ureor. A rechad a mocha ousbech a beras el beot a cheral, me ak mocha olterau el ngar er a blik. Ak di blechoel loumerang el kmo, a mesisiich e ungil siobai, a kirem el meringel el loureor, e orrengees er a re okiaksang, e mesterir a ike el lousbech el nga er se el ungil char. Ak dirrek el loumerang el kmo, a rechad ra ureor a kirel morengii a skulir, e mo mosisechakl a telengtengil a ureor, e dirrek el moungil a ududir a rechad, me ng mo blak a rengrir el mo er se el kot el tkurebab el sebechir. A kuumerang el kmo, a rechad er Belau a sebechir el mo mesisiich e ungil, me ng mo sebeched el teloi er a keizai lobengkel a beluulechad.

A orretel a mesisiich e ungil kabelment a diak el kakerous ma dorrurt er a mesisiich el siobai. Ngak a blak ra renguk a mo mendedmokl er a kabelment el kerekikl a usbechir a rechad er Belau. Ng kabelment el meskid a techall er a omesubel a duch ra ureor me a okedbechel a klemeriar reng el mo kudmeklii sel tkul rebab el sebeched. Ng mo BLEKETAKL, meng sebeched el mo omes aikel mekedmokl, edirrek el mo medengei el uasei, kede kildmokl aikel rokui el mle sebeched el kudmokl ng diak. Otekul a Ngerachel; ke de mo ngmai a mui el ngerachel el kirel a ike el doruul, me a lechub e ngi ke el diak deruul.

OTERKOKL RA RURT EL MO PRESIDENT

Page 2

Ke de ousbech er a kabelment el mangedmokol er a rechad, ke dousbech ra kabelment el msa klaumerang a rechad, ke de ousbech er a kabelment loldars a techall el mo er a rechad, ke de ousbech er a kabelment el mo ngmai a tkul rebab el ngliuelel el sebechel mekerker ra daisang er a beluu, luldumukl er ngii a; rechad, beluu, ma klechibelau er kid. A kuumerang el kmo, sel kot el klou el daisang er Belau, a rechad.

A kabelment er kid a mla otaut a klisichel er a meklou lomekedecheraol el uaia roled, blil a ureor ma klekool, olidiuul ra eldecheduch (dengua), dengki, ralm, me a blil a mekikiongell. Ke de mla mo medengell a ultutelel a siobai, e mla remuul a llechul me ng melemolem el mukeroul. Ke de mla kudmokol a ika el rokui, me loberek a techall er okerullel me a teketekel a keizai. Me chechang eng kmal mengai el mla mo kired el otutii meng diak lokor el rechad ra beluad a mo ngmai a dikesir er tia el ulekeroul el keizai.

Ak medengell a klou el ngerachel me a ringelel a ureor el mo mesang me a Belau a deteketekii el mo klungiolir a rechad er Belau, me ng moktek er ngak el ngoititerir a rechad el kimdak losisiu a uldesuam, me a blakerreng er kemam el kimdak loureor el kirel tia el moktek.

A klou a belkul el chad el ki bo mkaukledem el loureor a Vice-President. Nga er ngii a rechad el sebecherir el rredemelel tial ngerachel el kumdasu er tir, me ak mo ngmai e ungil suub a uldesuir a rechad ra beluu ra elsel a ikal merael el mei el sandei. Me chechang el mo risei, e ng soak el subedemiul el kmo, a mo Vice-President er kid, a chad el sebechemiul el moumerang er ngii, e chad el sebechemiul el mo ultuil er ngii, e chad el uai ngak el mo oureor el mo er a tkul rebab el kiriu.

A kuumerang el kmo, a rechad er Belau a mla mechoit. A re mengetekled a kirir el mo dmak e kudmokol a llach el mo omekdubech a sebechel motekau el okerullel a beluu. A denguu er ngak, ea sebechel motekau lokeroul a koremell a klechibelau ma beluad, e osisiu el taem e ngodbechii a mesisiich, e ouedikel el kerruul el sebechel dingii loltekau er ngii, e mo mengeluolu ra llemeltir a rechad ra beluu el mou ruikl ra klungiolel. A rokui el chad er Belau a kirir el dmak el ngartial omerael el **“Diak a tang el mo mechoit”**.

Ak mora bek'l cheldechulel loltaut ra urungulek ma mokdek er ngak el mengereomel, oldak, e mesebechakl er Belau, me se el kot el nga er bab el mekreos el daisang er ngii el **RECHAD** er Belau.

A kmal mereng a suliu el kirel a klaumerang ma ngeseu er kemiul ra ikal merekol rak, e l'muut loba ngariou el reng e lolengit ra melemolem el klaumerang er kau er tia el merael el mei el sengkyo.

Me a kulengit mem sengkyo er ngak, e bo dedak lomekall el bedul a kledaes e bekaititerechel el klukuk er kid, me a rengeleked, me a beluad.

Kom Kmal Mesaul

“BOLTA RENGUD, E BODEDAK, E DOREKEDII A KLEMAT ER BELAU”